

DE
FIDEIVSSORIBVS DOTIS

IN ALMA IVLIA CAROLINA
AVCTORITATE ET CONSENSV ILLVSTRIS FACVLTATIS
IVRIDICAE

AD D. XXVIII. MARTII MDCCXXXVIII.
IN IVLEO MAIORI

PRAESIDE
D. IOANNE FRIDERICO EISENHART
FACVLT. IVRID. ADIVNCTO

FRATRE SVO GERMANO
DISPVTABIT
CHRISTIANVS IACOBVS EISENHART
SPIRENSIS.

HELMSTADII
LITTERIS DRIMBORNIANIS.



L. 2. C. Ne Fideiussores vel Mandatores Dotium dentur

IMP. IVSTINIANVS A. IVLIANO PP.

Generali definitione constitutionem pristinam ampliantes, sancimus nullam esse satisfactionem, vel mandatum pro dote exigendum, vel a marito, vel a patre ejus, vel ab omnibus qui dotem suscipiunt. Si enim credendam mulier sese, suamque dotem patri mariti existimauit: quare fideiussor, vel alius intercessor exigitur, ut causa perfidia in connubio eorum generetur.



DE FIDEIVSSORIBVS DOTIS.

§. I.



Dotem, id est, pecuniam ad sustinenda matrimonii onera destinatam, a) apud plerasque gentes praeter Romanos vxori, a marito adlatam fuisse, quisque intelliget, cuicumque earum mores ac monumenta perlustrare lubebit. In eo enim earum instituta a Romanorum moribus potissimum, quod ad matrimonii contrahendi rationem attinet, differebant, quod apud hos maritus sibi vxorem coëmeret. Et quamuis nouellae vxori a parentibus, fratribus vel consanguineis aliquid datum fuerit, id tamen ideo fiebat, ne plane expers esset bonorum paternorum, quae moribus pri-

Apud Romanos dot ab vxore marito adferebatur.

scarum

scarum gentium non filiae, sed soli filii acquirebant, ad quem finem iis aliquid dabatur, quo viri patrimonium augerent. b) Nolumus iam omnium veterum gentium instituta & mores recensere atque copiosius de ista coëmitione vxorum agere, quum id satis ante nos iam ab aliis factum sit. c) De priscis Galliae ac Germaniae populis res omni dubio caret, cum hac in re testes omni exceptione maiores habeamus, CAESAREM nempe & TACITVM, rerum germanicarum scrutatores & scriptores fidissimos. Ille enim de priscis Galliae populis haec tradit: d) *viri quantas pecunias ab vxoribus dotis nomine acceperunt, tum ex suis bonis aestimatione facta, cum dotibus communicant. Huius omnis pecuniae coniunctim ratio habetur fructusque seruat, vter eorum vita superauerit, ad eum pars vtriusque cum fructibus superiorum temporum peruenit.* Hic autem haec refert: e) *Dotem non vxor marito, sed maritus vxori adfert.* Omittamus quae de aliarum gentium institutis adferri potuissent, cum haec, quae de maioribus nostris adduximus testimonia, nobis sufficere videantur.

a) L. 56. §. 1. D. de iur. dot. L. 20. C. eod.

b) PERIZONIUS de L. Voconia p. 27.

c) HEINECIUS ad L. Iul. & Pap. Poppaeam p. 254. TIRACQUELL. de LL. connubialib. gl. 1. P. 4. n. 9.

d) de B. G. L. VI.

e) de M. G. c. 18.

§. II.

*Cuius rei
ratio ex-
ponitur.*

Sola itaque Romana gens in constituenda dote aliam secuta est rationem, quae in eo consistebat, vt vxor marito istam pecuniam ad sustinenda matrimonii onera

onera destinata adferret. Quare etiam PAVLVS dicit: a) *reipublicae interest, mulieres dotes saluas habere propter quas nubere possunt*, quum indotata vix virum inueniret. Duplicem autem dotis Romanae rationem esse arbitramur, quarum altera in eo posita est, quod apud Quirites vxor maritum & maritus vxorem emebat, hinc licet filiae ad successionem bonorum paternorum vocarentur, nihilominus tamen dotem adferebant, veluti complementum pretii, quo a viris coëmptae fuerunt. Coëmptae itaque vxor lares & Deos penates mariti, vt sacrorum eius particeps fieret, coëmptae quoque vir vxorem, vt exhibet marmor vetustum b)

COS. AUG. PUB. CLAUDIO. QVAES.
AER. ANTONINAM. VOLUNIAM.
VIRGINEM. VOLENT. AUSPIC. A
PARENTIBUS. SUIS. COEMIT. ET
IIII FAC. IN. DOM. DUXIT.

Ad alteram autem dotis constitutae rationem quod attinet, ideo marito pecuniam seu alias res siue immobiles siue mobiles vxor adferebat, quo a concubina distingui posset, quae indotata in amplexum viri veniebat. Neminem fugere potest, apud Romanos concubinae nomen non solum honestum, verum etiam consuetudinem cum ea licitam fuisse, c) immo eam ab vxore solo delectu & animi destinatione diuersam fuisse, nec quidquam inter eas nisi dignitatem interfuisse. d) Hinc vxoris loco esse dicebantur, immo concubinae, vxores gratuita, sodalitariae amicae vocabantur, aliisque splendidioribus ac honestioribus huius generis appellationibus insignitae

fuerunt, vt marmora a GRVTERO, REINESIO aliisque viris de elegantioribus litteris bene meritis seruata, fatis testantur. Moris ideo fuit, istas vxores, quae indotatae viris nupserant, concubinarum instar habere, teste PLAVTO, apud quem LESBONICVS adolescens haec profert : e)

Nolo ego mihi te tam prospicere, qui meam egestatem leues

Sed vt inops, infamis ne sim, ne mihi hanc famam differant

Me germanam meam sororem in concubinatum. Tibi Sic sine dote dedisse magis, quam in matrimonium.

Solebant saepius filiabus pauperum ex aerario publico dotem dare, vt SENECA de filiabus Scipionis testatur : f) Scipionis filiae ex aerario dotem acceperunt, quia nihil illis reliquerat pater. PAPINIANVS quoque de SEVERO imperatore scribit, g) eum Flauii Athenagorae filiae dotem dedisse. Quae igitur vxorum Romanarum conditio omnino exigebat, vt maritis dotem adferrent, quo & iuris sacrorum participes fieri & a concubinis distingui possent.

a) L. 2. D. de iur. dot.

b) Rosin. in Antiq. Rom. p. m. 968.

c) L. 144. de V. S.

d) L. 5. C. ad SC. Orphit. L. 49. §. 4. D. de leg. III.

e) Trin. Act. 3. Scen. II. v. 62.

f) In consolat. ad Heluiam c. XII.

g) L. 6. §. 1. D. de usur.

§. III.

Dotis constitutae

His praemissis rerum pertractandarum ordo ad ipsam argumenti tractationem nos ducit, de quo pauca

ea differere nobis proposuimus. Germaniam cum iure Romano dotem quoque recepisse non opus est ut copiosius demonstremus, cum res omnibus nota ac manifesta sit. Quod itaque ad diiudicandas lites, quae circa dotes oriri possunt, attinet, earum decisio non tam ex iure patrio quam ex iure Romano petenda est. Quae cum ita se habeant, operae nos pretium facturos esse putauimus, si quantum nobis licet, inuestigaremus, an quoque vxor ratione earum rerum, quas dotis nomine marito adfert, ab eo fideiussores petere, aut alius loco vxoris illos exigere possit? Nolumus iam omnia repetere quae de fideiussoribus dici possunt. Quum enim fideiussio nil aliud sit, quam *contractus verbalis, quo quis alienae obligationi ita accedit, ut quod alius debet, se soluturum promittat, saluo manente debito principali*, a) eaque in omni obligatione locum habeat, b) illa eo magis dotis constitutioni accedere posse videtur. Quamuis enim maritus aliquod dominium pro natura rei in dote consequatur, c) rem dotalem vindicare, d) ratione nominum in dotem datorum actionem utilem personalem sine cessione aduersus debitorem mouere, e) fructus acquirere, f) immo etiam ob onera matrimonii res necessarias, quae dotem augent, percipere possit; g) nihilominus tamen ius dotis valde restrictum est, ita ut vxor eam possidere & domina dotis manere dicatur, h) cuius dominium, etsi constante matrimonio quiescat, nihilominus tamen eo finito reuiuiscit. Maritus enim dotem alienare nequit, quae alienatio adeo prohibita est, ut ne consentiente quidem vxore ea recte procedat, i) nisi biennio post repetitus fuerit vxoris consensus. k)

Tacca-

Taceamus alia priuilegia, quibus vxor ratione dotis gaudet. Ex his igitur satis apparet, omnino e re vxoris esse, vt post obitum mariti dotem saluam habeat, quo digne se alere possit. Saepius enim accidit, vt homines prodigi bonis muliercularum infidentur, diuitumque connubia quaerant, non vt cum illis vitae confortio fruantur, sed potius vt habeant, vnde genio suo indulgere possint, qui dissipatis atque dilapidatis coniugum bonis, eas postea turpiter deserunt, easque in maximam rerum miseriam ac calamitatem depellunt. Ergo non denegandum esse videtur, id, quod in securitatem creditorum constitutum est commune remedium, vxoribus, vt dotis causa a maritis suis fideiussores exigere queant, cum earum maxime interfit, vt olim dotes suas saluas habeant.

a) L. 1. §. 3. D. de O. & A. L. 65. D. de fideiuss.

b) L. 1. L. 8. §. 1. D. eod.

c) pr. I. quib. alien. lic. vel non. L. 75. D. de iur. dos.

d) L. 9. C. de R. V.

e) L. 71. D. de iur. dos. L. 2. C. de O. & A.

f) L. 7. pr. D. de iur. dos. L. 20. C. eod.

g) L. 7. §. 12. D. sol. matrim.

h) L. 15. §. 3. D. qui satisdar. cog.

i) pr. I. quib. alien. lic. vel non.

k) Auth. siue a me. C. ad SC. Vellej. Nou. 61. c. 2. Secundum theoriam hoc rectius negatur, loquitur nouella, ad quam prouocant de intercessione & donationibus propter nuptias, interim biennio post consensus vxoris firmatur, si modo ex bonis mariti dotem suam recipere possit.

§. IIIL

Non aduersatur aequitati naturali fideiussio dotis causa facta, immo illi eo magis conuenire videtur, quo
arctius

Dotis fideiussio

arctius ad sui rerumque suarum conseruationem leges *LL. Cod.*
 naturales quemlibet obligant. Ast aliter visum est *interdi-*
 summis legislatoribus, quibus talis fideiussio cum re-*sta.*
 eta ratione prorsus repugnare visa est. Audiamus
 GRATIANVM, VALENTINIANVM & THEODO-
 SIVM Augustos, Cynegio praefecto praetorio hunc
 in modum rescribentes: a) *Siue ex iure, siue ex con-*
suetudine lex proficiscitur, ut vir uxori fideiussorem ser-
uandae dotis exhibeat; tamen eam iubemus aboleri. Hanc
 constitutionem repetiit IVSTINIANVS sequentibus
 verbis: b) *Generali definitione constitutionem pristinam*
ampliantes, sancimus nullam esse satisfactionem, vel man-
datum pro dote exigendum, vel a marito, vel a patre
eius, vel ab omnibus qui dotem suscipiunt. Si enim
credendam mulier sese suamque dotem patri mariti existi-
mauit: quare fideiussor, vel alius intercessor exigetur,
vel causa perfidiae in connubio eorum generetur. Haec
 imperator. Videmus ex his eum prohibitionem an-
 tecessorum suorum Augustorum non solum amplifi-
 casse; verum etiam rationem huius prohibitionis ad-
 iecisse, nimirum ne causa perfidiae oriretur. Pulchre
 enim addit, non decere uxorem fideiussores exigere
 ab eo, cui animum & corpus credere haud recusauit.
 Eandem autem prohibitionem in C. Theodosiano, c)
 inuenimus, vbi Imperatores Valent. Theod. & Arcad.
 Martiniano rescribunt: *omnium sponso- rum vel fideius-*
sorum deinceps in cauenda dotis sponsione promissiones
absoluimus, quam prolixioris cuiusdam constitutionis
 partem esse Gothofredus ad h. l. coniicit. Quod si
 hasce constitutiones paulo curatius examinamus, no-
 bis certe felicitati matrimoniorum consulere voluisse,

optimi principes videntur. Omnem matrimonii felicitatem atque vinculi coniugalis perfectionem in eo consistere rati sunt, vt coniuges amore vero se inuicem prosequantur, & vt cum vna caro sint, vnā quoque animam efficiant, immo vitam coniugalem ita comparatam esse debere voluerunt, vt coniuges sui desiderium tanquam optimam famam post mortem relinquunt, quo omnibus testificarentur, se vixisse sine crimine, sine macula & querela, sine controuersia sine bile, d) seu vt illud Horatianum illis adclamari possit: e)

*Felices ter & amplius,
Quos irrupta tenet copula, nec malis
Diuulsus querimoniis
Suprema citius soluet amor dies.*

Iam vero isti felicitati coniugali nil magis obesse potest quam foeda perfidia, si discordes inter se sunt, & cum mutuo amore se amplecti debeant coniuges, mutuo odio inuicem se persequuntur. Ad quam igitur extirpandam tanquam omnium malorum radicem, quae vnquam matrimonia foedare ac turbare possunt, imperatores nostri hanc dotis fideiussionem tollendam esse iudicarunt. Quid enim sperandum fuisset, si ab initio immo iam ante matrimonium consummatum semina perfidiae spargerentur, quae res nimirum efficeret, vt durante postea matrimonio semper aliud ex alio proueniret malum, atque ea, quae OVIDIVS f) canit, euenirent:

Imminet exitio vir coniugis, illa mariti.

a) L. 1. C. *Ne fideiuss. vel mandator. dotium dentur.*

b) L. 2. C. *ead.*

c) L. 2.

- c) *L. vn. Theod. ne fidei. dot. dem.*
 d) *v. inscriptiones ap. GRUTERVII ET REINESIVM &c.*
 e) *HORATIVI L. 1. carm. od. 13.*
 f) *Metamorph. L. 1. v. 146.*

§. V.

Non putamus nos opus habere aliam reddere hu-
 ius prohibita^{Cuius} fideiussionis rationem, ac illam quam ^{prohibi-}
 imperator l. c. eleganter exhibet, ubi inquit: ne cau-^{tionis ra-}
 sa perfidiae in matrimonio generetur. Et sane quid ^{tio expli-}
 magis a ratione alienum est, quam dotem non credi ^{catur.}
 marito, cui se ipsam credere vxor non dubitavit. Hinc
 eo magis ista fideiussio rectae rationi contraria esse im-
 peratori visa est, ut, cum mulier suum animum suamque
 vitam marito credat, bona non committere velit, fi-
 demque magis alieni hominis, id est fideiussoris sequi,
 quam amicitiae, fideique mariti se tradere. Et fide-
 iussores & mandatores dotis imperatores admittendos
 esse prohibent in suis constitutionibus. Illi qui sint,
 ex LL. §. III. allatis apparet, nempe qui alienae obli-
 gationi accedunt, per mandatores autem illi intelligen-
 di sunt, quorum mandato vxor marito dotem dat. Se-
 cundum imperatoris mentem itaque maritus fideiussor-
 es dare non cogitur, siue lex adsit siue consuetudo,
 quae fideiussionem istam probet. Cuius constitutionis
 veram rationem Ill. LEYSERVS a) ex zelotypia Italo-
 rum aliarumque gentium versus orientem spectantium
 deriuandam esse existimat, quae an vera sit, lectoris
 sit iudicare. Vtraque enim constitutio tum ea, quam
 Theodosianus codex exhibet, tum Iustiniana ad gen-
 tes Orientis directae est, illa Martiniano Comiti Orien-
 tis, haec Cynegio eiusdem praefecto data, qui orienta-

lis imperii limes tunc luxu in viris & mulieribus dif-
 fluebat, quod ex Misopogone IULIANI ostendit GO-
 THOFREDVS l. c. Alia certe placuit MOLINAEQ,
 b) qui propter frequentiam matrimoniorum fideiuffo-
 res dotis non admitti, scribit, qui si admitterentur bre-
 uii accidere posset, vt omnes ciues fideiussionibus im-
 pliciti essent futuri, qua ex re indubie lites in immen-
 sum orirentur, quam ad mentem imperatorum pro-
 prius accedere non negamus. Quodsi enim zelotypia
 vera huius prohibitionis ratio esse debuisset, certe Au-
 gustos nostros alias quoque leges ferre, easque ad al-
 ios applicare casus oportuisset, ex quibus haec matri-
 moniorum pestis oriri potest. Sed nobis magis stu-
 duisse videntur, omnem perfidiae causam remouere,
 quam talis fideiussio post se traheret, & cauere, ne so-
 cietas coniugalis litibus implicaretur, quae sanctum
 hoc vinculum turbare & multos ab eo detertere pos-
 sent. Nostram quoque sententiam affirmat L. 8. C. de
 pact. conuent. vbi THEODOSIUS & VALENTINIA-
 NUS Augusti Hormidae ita rescribunt: *Hac lege decernimus vt vir in his rebus quas extra dotem mulier ha-
 bet, quas graeci parapherna dicunt, nullam vxore pro-
 hibente habeat communionem, nec aliquam necessitatem
 ei imponat. Quamuis enim bonum erat mulierem quae
 se ipsam marito committit, res etiam eiusdem pari arbi-
 trio gubernari; attamen quoniam conditores legum de-
 quitatis conuenit esse fautores, nullo modo (vt dictum
 est) muliere prohibente virum in paraphernis se volun-
 tumiscere.* Excepta est sola dos, quam vxor marito
 tuto committere possit, ne durante matrimonio perfid-
 diae causa generetur.

a) Spec. 523. m. 8.

b) De usur. n. 254.

§. VI.

Diximus §. superiori, imperatorem dotis fideiuf- *Iure vete-*
 sionem, quam in Codice Theodosiano quoque prohi- *ri Roma-*
 bitam inuenimus, a) nihilominus illicitam atque inua- *no valida*
 lidam declarasse, etsi lex aut consuetudo adsit. Ad *erat.*
 veteres leges ac mores nobis respexisse videtur, secun-
 dum quos, imprimis apud Romanos ista valida atque
 permessa fuit. De dote constituenda certe non est,
 quod dubitemus, quin & ante & post nuptias fidei-
 iussor ei accedere potuerit. Satis id indicant verba
 VLPIANI b) qui omni obligationi fideiussores accede-
 re posse, affirmat. Sed & dote iam constituta apud
 Romanos fideiussores exigi potuisse, in aprico est; c)
 ita tamen, ut haec fideiussio post nuptias a marito data,
 non obligaret, ante nuptias autem firma validaque ha-
 beretur, obseruante CUIACIO. d) Neque exemplis
 caremus, quae id pluribus ostendunt. Testem habemus
 MACROBIUM e) qui hac de re sequentia tra-
 dit: *Nam Asina, inquit, cognomentum Corneliae gen-*
tis erant fundo, seu filia data marito cum sponsores ab
eo sollemniter poscerentur, asinum cum pecuniae onere
produxit in forum, quasi pro sponsoribus praesens pignus.
 Patet idem ex L. 24. §. 2. D. sol. matrim. & L. 7. pr.
 D. de except. Iam vero inter omnes constat, eos, qui
 extra iudicii locum se pro aliis obligarunt, fideiussores,
 sponsores adpromissores, fideipromissores appellatos
 fuisse. f) Quare non dubitandum est, quin tales fi-
 deiussiones apud Romanam gentem stipulationum, ob-
 ligationum formularum alias tenacissimam, receptae
 fuerint, neque videmus, quae GOTHOFREDUM mo-
 uere potuerint, qui haec in dubium vocauerit, g) cum

si morum huius gentis rationem habemus, hanc fideiussorem optime conuenire illis videamus. Accedit quod apud Romanos istae fideiussiones eo magis adhibendae fuerint, quo frequentiora ante L. Iuliam & Papiam Poppaeam diuortia in usu fuerunt, quum saepius mariti vxorum dotes dissiparent, posteaque illas res suas habere iuberent, & ob leuissimas causas domo eicerent. At quoniam maritus si diuortii causa non admodum grauis erat, dotem lucrabatur, hinc facile patet vxorum interfuisse, quo sibi prospicerent, vt saltem dotem saluam haberent, cum tristis vox earum aures personaret:

*Collige Sarcinulas, (dicet libertus) & exi
Iam grauis es nobis, & saepe emungeris exi
Ocyus & propera; sicco venit altera naso. h)*

- a) L. i. C. Theod. ne fid. dot. dent.
- b) L. i. D. de fideiussor.
- c) L. i. C. Theod. ne fid. dot. dent.
- d) Paratit. C. ne fid. dot. dent.
- e) Libr. I. Saturn. c. VI.
- f) HEINECCIUS in S. A. I. L. III. t. XXI. §. IV.
- g) In Commentar. ad C. Theod. L. i. ne fid. dot. dent.
- h) IUVENALIS Satyr. I. v. 141.

§. VII.

*Eam hodie ad-
mittendam esse
multi ne-
gant.*

Vidimus hactenus dotis indolem atque prohibitionem imperatoriam ne eius nomine fideiussores dentur. Iam alia se se nobis obicit quaestio, an legis huius prohibitio hodie usum habeat, ita, vt secundum nostros mores ista fideiussio inualida dicenda sit? Quodsi tot magnorum virorum auctoritates sequi vellemus, res facilis esset negotii, quid de hac quaestione statu-

statuendum sit, definire, & cum IVSTINIANO talem fideiussionem haud admittendam esse, declarare. Non negandum est, rationes quas imperator attulit, ita esse comparatas, vt extra omnem dubitationis aleam positae esse videantur, cum eo sint directae vt matrimonia nullis litibus implicarentur, quarum exitus semper funestus esse solet. Hinc etiam nemini mirum videri potest, si tot magni nominis viri eas amplexi sunt ac defenderunt. Accedit iuris Iustiniani auctoritas & vsus in foris germanicis, & legum patriarum defectus, quae de hac re parum vel plane nihil determinarunt. Quum igitur in defectu patriarum legum auctoritatem iuris Romani sequi soleamus, facile apparet, cur ista sententia defensores suos inuenerit. Ad haec omnia venit, quod cum dos, Germanis olim ignota, a Romanis in nos deriuata fuerit, eius iura secundum iuris Romani principia sola esse diiudicanda putarunt. Quae cum ita se habeant, operae pretium esse duximus, si diuersas iurisconsultorum sententias afferamus, antequam nostrum hac de re iudicium laturi simus, quo facilius diiudicari possit, an huic constitutioni imperatoriae hodie standum, an autem alia sententia amplectenda sit.

§. VIII.

Quaestionem, vtrum vxor dotis nomine fideiuss-
fores a marito exigere possit, plane inutilem, super-
fluam nullaque diiudicatione dignam esse, iudica-
uit, WISSENBACHIVS a) quia vxor vi legis
30, D. de iur. dot. in bonis mariti hypothecam habet,
immo etiam in bonis eius, qui illam promissit, secundum

L. vii.

L. vn. §. I. C. de rei vxor act. Dotis quoque nomine fideiussores haud dandos esse, putat HILLIGER in Donello enucleato, b) vbi aliorum virorum sententias recenset, quibus suam confirmat. Neque praetereundus est, qui de fideiussoribus ex instituto scripsit, HERRINGIVS, c) eos non admittendos esse, pariter existimans, quem in finem multas rationes adducit. Pro huius sententia quoque militat BRUNNEMANNVS, d) qui istam rationem addit, ideo inuvalidam esse hanc dotis fideiussionem, quia mulier ne quidem legi huic prohibitiuae renunciare possit. Nam cum caetera mariti bona vxori tacite obligata sint, idem intuitu dotis dicendum esse putat, quae praeterea multis priuilegijs gaudet. Immo ne tunc quidem fideiussionem validam esse arbitratur, si extraneus de dote restituenda sibi stipulatus sit. Nolumus autem recensendis aliorum virorum sententijs diutius immorari, cuius causa ad HILLIGERVM & BRUNNEMANNVM, qui eos citarunt, lectorem ablegamus. Omnia enim eorum argumenta eo redeunt, vt ideo talis fideiussio haud permissa sit, quia amore, non cautionibus, matrimonia constare debent. Ex his sequi videtur, vt nec sponte oblarus fideiussor ab vxore acceptari possit, quia huic iuri prohibitiuo vxor renunciare haud queat, cum hoc priuilegium non singularibus personis, sed vniuerso sexui datum sit. Argumentum quoque peti solent, ex *L. 21. D. de R. I.* quae ita se habet: *non debet, cui plus licet quod minus non est non licere.* Quum itaque maius sit vita, minus autem bona, recte argumentatio procedere videtur, quam imperator l. c. tradit: si enim credendam mulier sese suam-

suamque dotem patri mariti existimauit, quare fideiussor vel alius intercessor exigitur. Ergo inutilis esse videtur ista fideiussio quae dotis nomine fit, cum marito vxor ipsam vitam & animam, quibus nil maius, nil carius habet, committat.

- a) t. D. de fideiussor.
- b) Libr. XV. n. f.
- c) De fideiussor. c. 6. n. 140.
- d) Ad C. h. tit. ne fideiussor. dot. dentur.

§. VIII.

Quamuis finis, quem in promulganda ista constitutione, ne fideiussores dotium dentur, imperatores sibi proposuerunt, laudandus, immo vix impugnandus esse videatur; nihilominus tamen aliud statuendum esse putamus si de eius vsu hodierno rectam ferre sententiam velimus. Commune hoc habet societas coniugalis cum aliis, vt multis malis multisque euentibus tristioribus obnoxia sit, qui saepius istam turbant ac miseram reddunt, vel ea finita magnis altercationibus occasionem praebent. Enimuero saepius accidit, vt, quamuis vxor marito se commiserit, nihilominus tamen bonorum quae ipsi credidit, iacturam faciat, cum post consummatum matrimonium nouellus maritus ea dissipare incipiat & coniugalis amoris mox oblitus, parum curae habeat, vnde coniux superstes olim alimenta capere debeat. Fingamus maritum esse heluonem, prodigum, hominem deperditum, vxorem contra diuitem, vnde illa dotem suam saluam habere vult, si ipse maritus omnibus opibus destitutus est? Quanta non mouentur lites, vbi de probanda dotis illatione quae-

quaestio occurrit? Quodsi igitur saeculi praesentis rationem habemus, in quo tales controuersiae plus audiuntur, quam vnquam auditaе sunt, tantum abest, vt istam fideiussionem improbemus, vt potius iure meritoque eam admittendam esse, censeamus, cum optimum remedium elargiatur, quo tot tantaeque funestae lites euitari queant. Recte Ill. LEYSERVM a) iudicare arbitramur, cum dicit: *Fateor maius esse corpus, minus bona. Ast subordinata non sunt. Vnum enim sine altero esse potest. Accidit saepe vt iuuenis vitam suam animumque praeceptori formandum committat, cuius fidei nec minimam bonorum suorum partem crederet. Et magistratus saepe facultatem habent vitam delinquenti, non etiam bona auferendi. Nou. 134. c. ult. C. C. C. A. 218. cur ergo foeminae non licet, se corpusque suum marito sine cautione committere, quum ratione eius nullum periculum imminet; sed pro dote & bonis, de quibus securam non est, fideiussionem exigere? nec est, quod pudicitiae eius cum imperatore timeas.* Haec LEYSERVS. His quoque addi meretur, quod cum dotis nomine a marito pignora recte accipiantur, b) non eodem iure ab eo fideiussores exigi debeant?

a) *Sp. 523. M. 8.*

b) *L. 7. §. 6. D. de donat. inter vir. & vxor.*

§. X.

*Id quod
mult
agnou-
runt, qui
tamen va-*

Non defuerunt autem magni nominis iureconsulti, qui aliud statuendum esse agnouerunt, atque priuilegium in fauorem mariti doti datum omni ratione carere animaduicerunt, licet illud impugnare & plane reprobare non ausi sint. Quam igitur ob rem ad hoc

hoc restringendum multas distinctiones & cautelas excogitarunt, quibus fideiussionem dotis corroborare studuerunt. Ita eam validam esse pronunciat IOANNES BRUNNEMANNVS a), si maritus ad inopiam vergat. Nititur potissimum iuris canonici auctoritate, b) & huic quoque sententiae subscribunt THOMINGVS c) & SCHNEIDEWINVS. Vtlierius autem progreditur CARPZOVIVS d), qui cautionem pro dote ab initio & ante sponsalia contracta recte exigi putat, quod nec tum a marito, sed ab eo, qui maritus adhuc speratur, cautio petatur, quam promissam post matrimonium contractum praestare tenetur. Immo & tum cautionem pro dote praestandam esse putat, si eam non petat ipsa mulier, sed is, qui ex necessitate dotem soluere debet, ut pater patrisue heres aut debitor, quisque ille sit, qui ad dotem constituendam teneatur. e) Maricum porro volentem valide fideiussorem dare pro dote, ac titulum *C. ne fideiussor. dot. dent.* non tam prohibere dationem fideiussorum, quam ne quis inuitus fideiussoribus cauere cogatur, putat DYARENVS. f) Inter fideiussorem de dote conferuanda & fideiussorem de dote soluenda distinguunt, & hunc, non illum admittunt alii. g) Alii fideiussorem ab extraneo nomine mulieris recte accipi putant, & ut id commodum fieri possit, extraneum illum pro vxore dotem expromittere, id est, nouandi animo in se suscipere iubent, id quod inprimis CORVINVS innuit. h) Iureiurando hanc fideiussionem confirmandam esse existimat GVTTIEREZ, i) BALDVS autem coniunctam personam fideiubere posse dicit l) GAILIVS m) fideiussorem, si qua marito obaerato scienter nubat, ad-

rias di-
stinctio-
nes circa
eius ad-
missionem
excogita-
runt.

mittit, solus HART. PISTOR n) maritum sua sponte fideiussores recte dare eosque ita obligari contendit. Plures virorum doctorum de hac quaestione sententias, sistit, quem saepius iam laudauimus Ill. LEYSERVS. o)

- a) *Exercit. Iustin. XVIII. §. 1. I. de fid.*
- b) *Dec. 58. n. 4.*
- c) *In comment. ad I. tit. de fideiuss. n. 12.*
- d) *P. II. c. 42. d. 17.*
- e) *L. 33. D. de iur. dot.*
- f) *In tract. Sol. matr. tit. de dot. c. 4.*
- g) *Apud Bartol. in L. Si const. §. quot n. 2. 3.*
- h) *del tit. C. Ne fid. dos.*
- i) *De iuram. confirm. P. I. c. 21.*
- l) *Nou. de dot. priuil. 21. n. 4.*
- m) *L. II. obf. 34. n. 9.*
- n) *Obf. 35.*
- o) *I. c.*

§. XI.

*Fideiussio
dotis mo-
ribus Ger-
manorum
non ad-
uersatur.*

Quaeras itaque quanam sententia in lite tam ardua praeferenda sit? Nos hanc quaestionem ex moribus ac legibus patriis magis, quam ex iure Romano decidendam esse arbitramur. Dotem iure Romano a Germanis recepto simul quoque receptam esse, certo certius constat. Hanc tamen differentiam animaduertimus, dotem iure Romano esse omne id, cuius dominium ciuile in maritum transfertur; ac Germani per eam illud intelligunt, quod pater, mater, cognatus vel ipsa vxor sub initium nuptiarum ad sustinenda matrimonii onera marito tradit. Quamuis haec verissima sint; tamen Germanica gens in constituenda dote non eandem rationem secuta est, ad quam Romani potissimum respexerunt. In eo quidem mo-
res

res patrii cum Romanis conueniunt, quod etiam in compensationem onerum matrimonii destinata esse debeat, sed altera ratio cessat, quo vxor a concubina distingueretur. Sic olim quoque ante dotis in Germania vsum omnia, quae vxor marito adferebat, in suppellectile ac pecorum apparatu consistebant, quae communi societatis coniugalis vsui destinata erant. a) Ad hunc quoque finem, quo vxor digna conditione sua alimenta defuncto marito habere possit, ex iure Germanico hodie seruatur dotatitium. Quae cum ita se habeant, quisque intelliget, quantum vxoris intersit, dotem saluam habere, & cum melius sit dotis iura ab initio seruare salua, quam post vulneratam dotis causam remedium quaerere; b) non dubitamus, quin hodie vxor dotis causa a marito fideiussores petere possit.

a) Ill. ESTOR in diss. de apparatu & instructu nuptiarum.

b) L. ult. C. in quib. caus. in integr. restitut. necessar. non est.

§. XII.

Germanam gentem omnium subtilitatum ignaram, Apud Germanos
quas ad firmanda corroborandaque pacta praeter Romanos
excogitauit, simplicem tantum & naturalem obligandi rationem secutam esse, omnes norunt. Erant omnia pacta
autem secundum priscos Germaniae mores omnia pacta valida, quae honesta fuerunt, omni-
que obligationi accedere potuerunt. Quare etiam nulli dubitamus, quin secundum priscos Germaniae mores fideiussio pro dote exigi queat, cum nil inhonesti aut iniqui in se contineat. Et si enim vxor marito corpus suum credat, ideo tamen non sequitur, vt non ratione dotis
modo honesta fuerint.

ab eo fideiussores petere possit. Non enim haec subordinata sunt, ut recte LEYSERVS l. c. a) monet, & vnum sine altero esse potest. Nobis igitur magis argumentatio placet, omnem conuentionem, quae nulla iniustitia aut turpitudine laborat, licitam esse aque obligationi accedere posse, hinc etiam fideiussionem pro dote ne quidem excludendam esse censemus. Si enim tantus semper inter coniuges esset amor, quantum esse oportet, nec saepius coniux coniugi diffideret, omnino cum imperatore statuendum esset, nec fideiussores nec pignora nec expromissores dotis causa exigendos esse. Dum vero haec praesentis saeculi conditio sit, non plane improbanda est haec fideiussio dotis causa facta quum nil turpe praeterea redoleat. b) Adeoque etiam factum est, ut moribus diuerforum locorum, ut mox indicaturi sumus, recepta sit.

a) *Spec. 523. M. 8.*

b) *SENECA de benef. III. c. 15. Vinam, inquit, nulla stipulatio emtorem venditori obligaret! nec pacta conuentaque impressis signis custodiuntur! fides potius illa seruetur, & aequum colens animus! sed necessaria optimis praetulerunt, & cogere fidem, quam spectare, malunt. Adhibentur ab utraque parte testes: ille per tabulas plurima nomina; interpositis parariis facit. Ille non est interrogatione contentus, nisi rem suam tennit. O turpem humano generis fraudis ac nequitiae publicas confessionem! Annulis nostris plura, quam animis, creditur.*

§. XIII.

Iura

Weichbildico fide-

Quae de fideiussione dotis secundum mores Germaniae valida diximus, iura patria confirmant. Ita iure Weichbildico a) statutum est: *Diemeil ihr ihr*

Ehes

Ehegesd nicht geleistet wird, daß ihr gelobet ward, *iussu do-*
da sie ihren Mann nahm, darf sie auch die Gewehr *tis per-*
des Guts nicht räumen, die Erben weisen sie denn *mittitur.*
ab mit Recht, oder mit Güte. Hat sie aber Bür-
gen dafür, so darf sie die Erben nicht mahnen, we-
der in der Güte noch zu Recht, so soll sie die Ge-
wehr räumen und dem Gelübde der Bürger folgen.

Adeo autem omnia istis verbis determinata sunt, vt
satis ex illis appareat, non solum vxori facultatem a
marito dotis causa fideiussores exigendi competere;
verum etiam istam fideiussionem licitam, honestam &
firmam esse. Vindicatur possessio fundi vxori tamdiu,
quamdiu ipsi dos illata nondum reddita est. Denega-
tur autem illi actio contra heredes, si a marito fideiusso-
res dotis causa accepit, quos hoc casu dotis restitu-
endae gratia conuenire potest. Obiici quidem posset
huic dispositioni, non opus esse vxori fideiussoribus,
cum iam retinendi fundum mariti ius habeat, donec
ei ratione dotis illatae satisfiat. Sed bene animadu-
ertendum est, vxori hoc in casu probationem incumbe-
re, dotem a se vere esse illatam. Ab hoc autem pro-
bandi onere vxor liberatur, si maritus ei fideiussores
dedit, quorum fidem sequitur, quibus etiam dotis re-
stituendae causa litem mouere potest. Immo non
solum respectu vxoris fideiussionem hanc admittendam
esse arbitramur, verum etiam inuitu liberorum, quo
etiam hic ratione maternorum securitatem habeant.
Idque eo magis necessarium esse videtur in casu, si
defuncta vxore maritus ad secunda vota transit. Quam-
uis enim dos ad liberos prioris matrimonii pertineat,
tamen

tamen eius vsusfructus parenti competit, hinc maxime liberorum interest, dotem olim saluam habere.

a) *Art. 24.*

§. XIII.

*Vsus eius
in Pom-
merania ma-
ximus.*

Praeter textum allegatum aliorum quoque locorum statuta hanc dotis fideiussionem comprobant, ex quibus simul patet, eius vsum maximum esse. De Pommerania id testatur MEVIVS, a) ius commune ibi ratione fideiussorum pro dote conseruanda datorum non amplius in vsu esse eosque non attenta eius dispositione contraria condemnatos fuisse. Vbi vero singularia prouinciarum statuta iuris Romani dispositionem non admittunt, ibi res extra omnem dubitationem posita est. Sed recte argumentum pro defendenda ista fideiussione petitur, quod illi, vt supra monuimus, nulla turpitudine inest, neque metuendum sit, ne causa perfidiae inde oriatur.

a) *P. V. D. 236.*

§. XV.

*Approba-
tur etiam
iur. can.*

Licere vxori dotis causa a marito fideiussores exigere corroborat ius canonicum, cuius in foris nostris maxima auctoritas est. Nullam recte rationem legum Romanarum habuit, INNOCENTIVS III. Pontifex a) immo in casu, quo maritus cautionem praestare nequit, dotem mercatori committere & vsuras inde redactas marito ad onera matrimonii sustinenda soluere iubet. Ita enim expresse sanxit: *Per vestras litteras intimasti, quod cum magistrum R. super quadam summa pecuniae pro H. paupere auctoritate nostra curaueritis con-*

con-

conuenire : quam idem H. pro dote uxoris suae requirebat, ab eo dictus R. exceptionem opposuit contra ipsum, quod uxorem suam a se repulerat & tacita veritate super hoc litteras impetrauerat, quia cum supra eadem dote alia vice coram vestrae ciuitatis consulis quæstio mota esset, ipsi pronunciauerunt, vt quoniam idem H. ad inopiam vergere videbatur, dos illa non assignaretur eidem, nisi cautionem idoneam de ipsa non peritura præstaret : vnde vos ei vt de saluanda dote caueret, & uxorem suam reciperet, præcepistis. Cum ergo satis possit ei modicum credi dotis, cui creditum est corpus uxoris, mandamus quatenus dotem assignari faciatis eidem sub ea, quam potest cautione præstare, vel saltem alicui mercatori committi, vt de parte honesti lucri dictus vir onera possit matrimonii sustentare : ne occasione dotis detentæ uxor a viro dimissa, seu vir qui dimisit uxorem, adulterii reatum incurrat.

a) C. 7. X. de donat. int. vir. & uxor.

§. XVI.

Immo iuri Romano hæc fideiussio quoque aduersari haud videtur, quod ex eo confirmatur, quod pignus in securitatem dotis vxori a marito dari possit, a) *Nec non certo recur. igitur non fideiussor ? Distinguit quidem CUIVS SPECULI IN CIUI.* b) inter pignoris & fideiussionis dationem, quam tamen differentiam vix subsistere arbitramur. Fideiussores maxime adhibentur, vt creditoribus caueatur c), eadem vero ratio est pignorum, atque ita finie

cendus est. Vbi vero maritus volens & sponte fideiussores constituit, omnino perfidiae metus cessat, immo potius eius cura, quo vxor olim dotem suam saluam habeat, laudanda est.

a) L. 7. §. 6. D. de donat. inter vir. & vxor. L. 17. §. 1. D. ad SC. Velleian.

b) in tr. 4. ad African.

c) pr. l. de fideiuss. L. 1. D. qui satisfac. cog.

§. XVII.

*In Gallia
olim quo-
que rece-
pta fuit.*

Agnouerunt id quoque exterae gentes, quae ab hac Imperatorum nostrorum dispositione abierunt, fideiussores simpliciter admittentes dotis causa. Ita apud Gallos fideiussores in matrimoniis ex vtraque parte interuenisse tabulae dotales docent, quibus Humbertus Bellioci dominus Elisabetham filiam cum dote ducentarum librarum annuarum Raynaudo de Foresio desponsauit, Raynaudus vero pro dotalitio medietatem terrae iuriumque suorum promisit, quae ita in fine se habent : a) Nos vero dictus Humbertus Dominus Bellioci, de dicto matrimonio consummando & perficiendo, & de dictis ducentis libris Vienn. dotalibus assidentis, ut supra dictum est, damus dicto Raynaudo fideiussores & obfides Willelmum Chabue, Palatinum de Riozterio, Hugonem Palatini, Rudolphum Lotru, & Guidonem de Sancto Saturnio Milites, qui ad defectum nostrum promiserunt, per sacramentum super sancta Dei euangelia praestitum, & quilibet in solidum tamdiu tenere ostagia, apud Clepiacum in Foresio infra octo dies, postquam fuerint requisiti, donec de dicto defecto praefato Raynaudo & supra dictae Elizabeth plene fuerit satisfactum.

factum. Ego vero dictus Raynaudus de dicto matrimonio a me consummando & perficiendo, de dicto Humberto domino Bellioci fideiussores & obsides Guidonem de Tyer Canonicum Lugdunensem, Hugonem de Coray Decanum Montisbrusonis, Fulcherium Guerrici, Willelmum de Augerolis Militis, & Willelmum de Verneto Burgensem Montisbrusonis, qui ad defectum meum promiserunt per sacramentum supra sancta Dei Evangelia praestitum, & quilibet in solidum tamdiu tenere ostagia apud Belliocium infra octo dies, postquam fuerint requisiti, donec ipsum matrimonium fuerit perfectum, & etiam consummatum. Nos vero supra dicti Guido Comes, Raynaudus, Humbertus dominus Bellioci, & nos omnes supra dicti fideiussores, rementiamus in hoc facto ex certa scientia, & sub praestito iuramento actioni & exceptioni doli, vel fraudis, neque metus causa & legi dicenti pactum de futura successione non valere, beneficio epistolae Divi Hadriani, & omni auxilio, beneficio, & Iuri Canonico & civili scripto & consuetudinario, promulgato & promulgando, quod nobis vel nostris advenientum contra praedicta, vel aliquid de praedictis posset competere modo aliquo vel prodesse.

a) D' ACHERY in *Spicil.* t. 3. p. 623. Sistit eas III. LEYSERVS l.c.

§. XVIII.

Satis nobis ostendisse videmur, dotis causa fideiussores admittendos esse, neque fideiussionem dotis causa factam bonis moribus aduersari, nil itaque restat. *Fideiussores* *res quis-*

sint? Diuersa autem ratione haec fideiussio fieri potest. Nimirum potest fideiussores exigere is, qui ad dandam dotem obstrictus est, vt in profectitia pater. Potest quoque mater aut alia persona in dote aduentitia huius causa fideiussores petere. Vxor quoque recte eos a marito postulare, aut maritus eos offerre potest. Immo quamuis alii id negent, ob adductam prohibitionem; tamen constat, cuilibet iuri pro se introducto renunciare, permissum esse. Ita quoque vasallus ratione dotis ex feudo filiae debitae fideiussores petere potest, quod de Pomerania laudatus MEVIUS a) testatur, ibi frequentissimum, pactis dotalibus nobilium, quae continent promissionem & stipulationem restitutionis dotis in casum soluendi matrimonii, proximos consanguineos aliosue vt fideiussores dotis assumi.

a) l. c.

§. XVIII.

*Et ante
& post
matrimo-
nium con-
tractum
peti pos-
sunt.*

Altera quaestio est, quonam tempore fideiussores dotis ab vxore peti debeant? Vt fideiussio ab initio & ante matrimonium consummatum exigatur, vult CARPZOVIVS a) quippe quod nec tum a marito, sed ab eo, qui adhuc maritus speratur, cautio petatur, quam promissam post matrimonium contractum maritus praestare teneatur. Sed cum IVSTINIANVS ob hanc rationem fideiussionem dotis potissimum prohibuerit, ne occasio perfidiae generetur, ista distinctio in fideiussores ante & post matrimonium a marito datos, rationem legis non excludit. Secundum mentem enim imperatoris omnia euitanda sunt, quae matrimonia turbare, & perfidiam excitare possunt. Iam vero si sponsa a marito futuro fideiussores hac ratione exigit,

igit, etiam ante matrimonium eius fidem suspectam reddit, cum tamen illi se totam committere debeat. Hinc magis menti imperatoris conuenire arbitramur, vt neque ante neque post contractum matrimonium fideiussores dotis causa dentur, sed vt in genere ista fideiussio prohibita sit. Quoniam autem istam dispositionem nostris temporibus haud conuenire iam ostendimus, merito & ante & post matrimonium consummatum fideiussores dotis & dari & accipi posse, putamus. Potest enim accidere, vt vxor ante matrimonium nullam rationem habeat exigendi a marito fideiussores, iam vero durante matrimonio euenit, vt inopinato maritus bona dissipare aut ad inopiam vergere incipiat. Quum autem & reipublicae & vxoris intersit, dotem saluam esse, non videmus, cur non post contractum matrimonium vxor sibi prospicere & ad fideiussores sibi sistendos maritum adigere possit, cum fideiussio ista nullam turpitudinem redolet, inprimis cum vxor in aliis quoque contractibus constante matrimonio fideiussores poscere queat. Interim cautelam esse pro vxore arbitramur, vt ante matrimonii consummationem fideiussores petat, ne postea vel blanditiis vel minis mariti moueatur, quo minus eas exigit.

a) P. II. c. 42. d. 18.

§. XX.

Ex his apparet, datis fideiussoribus vxori eadem iura competere, quae alias aduersus fideiussores locum habent. Hinc soluto matrimonio ab vxore recte con-

Fideiussorum dotis obligatio.

guitur, quibus alias obligationes fideiussoriae tolluntur. Sic v. c. expirat, si ad certum tempus cum protestatione facta sit, vel lapsu temporis per exceptionem pacti vel doli fideiussor liberetur b), vel denique si vxor in mora vindicandi dotem extiterit, cum adhuc salua fuerit.

a) L. 1. §. 4. D. de fideiuss.

b) L. 44. D. eod.

§. XXI.

*Itemque
iura.*

Pauca his, quae de fideiussoribus dotis disputaui-
mus, adiciere non poenitebit de eorum priuilegiis, ni-
mirum an illis quoque beneficia competentiae, ordi-
nis, diuisionis & cedendarum actionum competant?
Quod ad beneficium competentiae attinet, quamuis
nonnulli id fideiussoribus vindicarint, illud tamen me-
re personale est, a) quae autem personis inhaerent
strictissimae sunt interpretationis, adeoque fideiussor-
ibus recte denegatur. b) Reliqua autem beneficia
quin fideiussoribus dotis competant nulli dubitamus,
cum omnibus communia sint. Quae cum ita se ha-
beant, hoc quoque fideiussori dotis indulgendum esse
putamus, vt in solidum conuentus opposita excep-
tione facile impetrare possit, vt obligatio inter confide-
iussores diuidatur, c) immo prius ad soluendum ob-
stringi nequit, quam maritus exstiterit, d) Porro
quoque, si plures dati sunt fideiussores, vni in solidum
soluturo hoc indulgendum est, vt vxor ei actiones
aduersus confideiussores cedere teneatur, quibus quod
ultra ratam soluit a confideiussore repetere possit. e)
Tandem quoque quaeri potest, an fideiussor dotis
ex-

exceptione cessionis bonorum vti possit? quod etiam negamus, cum quoque nec foemina pro dote intercedens SCro Velleiano iuuetur. f) Nec maioris momenti est quaestio, num vxori in bonis fideiussoris tacita hypotheca & praelatio competat? quam optime MEVIUS g) diiudicasse nobis videtur, qui argumento *L. vn. §. I. de R. V. A.* vxori tacitam hypothecam competere ostendit, non autem ius praelationis, quod velut singulare priuilegium non competit, nisi lege concessum fuerit, quod dum nullibi in corpore iuris reperitur, mulieri in bonis aliorum quam mariti concessum, tribuendum haud est, aut citra constitutionem extendendum. Locum enim hic quoque habet regula iuris, quod priuilegia strictissimae interpretationis sint, nec ultra casum expressum extendi debeant.

- a) *L. 13. D. solut. matrim.*
- b) *L. 196. de R. I. L. 3. §. 1. D. de cens.*
- c) *§. 4. de fideiuss.*
- d) *Nov. III. c. 1.*
- e) *L. 39. D. de fideiuss.*
- f) *L. 12. L. 10. C. Ad SC. Vellei.*
- g) *P. III. d. 326.*

T A N T V M.



NOBILISSIMO ATQVE DOCTISSIMO
R E S P O N D E N T I

FRATRI SVO DILECTISSIMO

S. P. D.

D. IO. FRIDER. EISENHART.

Si unquam laeto animo in arenam disputatoriam descendendi, maxima certe laetitia hodie adficio, cum TE, FRATER DILECTISSIME, in eam comitari mihi contigit. Quamvis optimorum parentum obitus immaturus mature nos seiuuixerit, & de TVO amplexu per aliquod temporis spatium me auulserit, disiunctos tamen iterum coniunxit alma IVLIA CAROLINA, quam ego nunc patriam meam veneror, ubi uterque nostrum Themidis atque musarum artes coluit. Non patitur arctissimum, quod inter nos sanxit natura, vinculum, ut in laudes TVAS excurrant TVASque animi dotes & singularem in pertractandis iurisprudentiae ac humaniorum litterarum studiis industriam publice celebrem. Iam saepius eiusmodi generis conflictui interfuisti, & tam respondentis quam opponentis officio cum laude functus es, quae res certissimam omnibus spem praebet, TE quoque talem TE praestitutum esse, qualem militem veteranum decet. Ex animo TIBI itaque de hoc specimine gratulor DEVMque O. M. precibus quam ardentissimis imploro, ut TE semper sospitem ac saluum praestare velit TIBIQUE omnia fausta euenire iubeat. Quod reliquum est, certus sis, me nihil unquam eorum intermissurum esse, quae officium ac naturae vinculum a me postulant, meque per omnes vitae meae dies in eodem affectu in TE perseveraturum esse, quo TE a primis vitae TVAE incunabulis prosecutus sum. Vale. Dabam in IVLIA CAROLINA d. XXVIII. Martii MDCCXXXVIII.

A611471569